

Huet

I.

Bien ait l'amor dont l'on cuide avoir joie
De bien amer et servir longuement!
Mais je n'atent fors la mort de la moie,
Que j'ai empris d'amer si hautement,
Et si n'i voi fors mon definement,
Se ma dame de moi pitié ne prent,
Ou loiautcz et Amors ne l'en proie.

II.

S'il avenoit que, si joene et si bloie,
De si haut pris amast si bassement,
Espérance de guerison avroie
De ma dolor, et des maus ke je sent;
N'est pas ainsi, ains est tôt autrement:
Car s'il avoit en moi valors tels cent,
Si haute amor deservir ne porroie.

III.

En Amors a si haute seignorie
Qu'ele a pooir des povres enrichir;
Por ce atent sa merci et s'aïe;
Qu'el me puet faire en si haut point venir
Que ja n'avront pooir de moi nuisir
Faus losengier qui pensent de haïr
Loial amor; c'est lor ancesserie.

IV.

Douce dame, se j'ai dit par folie
Nule chose dont maus doie venir,
Ce fait Amors, qui si estroit me lie
Que n'ai pooir de mon sens maintenir.
Dedenz son cors vueil ellire et choisir
Le plus fin cuer por loiaument servir
Dont onques fust haute honor deservie.

V.

Deservir! Dieus, qui porroit en sa vie
Si haute emprise achever et fornir?
Je ne di pas que ce soie je mie,
Qu'Amors m'i fet endurer et sentir
A ma dame les maus dont je sospir;
Dont riens ne m'est médecine a guérir,

S'en bien amer ne recovrois m'amie.

- letto 369 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/huet-7>